

約章成案匯覽

約章成案匯覽乙篇卷三十二下目錄

成案

游學門

總署奏遵議派員攜帶學生出洋肄業應辦事宜摺

同治十一年

北洋大臣李奏選華弁出洋習藝並洋弁給獎片

光緒二年

北洋大臣李奏調回管帶幼童駐洋肄業人員請獎摺

光緒四年

北洋大臣李奏派往外洋華弁學成回華給獎摺

光緒五年

北洋大臣李奏德國提督教導華弁出力給獎片

光緒五年

北洋大臣李奏德國武員教導華弁出力給獎片

光緒五年

北洋大臣李奏閩廠生徒肄業期滿回華華洋教導出力各員

給獎摺

光緒七年

北洋大臣李等奏續選閩廨生徒出洋摺

光緒七年

總署奏遵議遴選生徒游學日本事宜片

光緒二十五年

出使韓國大臣許奏學生出洋不准驟保道府片

光緒二十七年

專使日本大臣載奏查覆日本游學生聚眾滋事情形摺

光緒

二十八年

北洋大臣袁奏遣派學生赴日本肄業片

光緒二十八年

外務部奏請簡派日本游學生總監督摺

光緒二十八年

外務部奏議覆四川籌提間欵選派學生出洋游學摺

光緒二十八年

宗人府奏宗室子弟分別出洋游歷游學摺

光緒二十八年

管學大臣奏派學生前赴東西洋各國游學摺 光緒二十九年

出使日本大臣兼管游學生總監督楊奏請酌調人員專司學

務片 光緒二十九年

署江督張奏選派水陸各師學堂學生出洋肄業片 光緒二十九年

署鄂督端奏派學生前赴比國游學摺 光緒二十九年

署鄂督端奏派學生前赴美德俄三國游學摺 光緒二十九年

湘撫俞奏設師範館並續派學生留學日本摺 光緒二十九年

政務處奏議覆湖北請獎派赴日本游學畢業學生摺 光緒三十年

出使日本大臣楊奏陳兼管學務情形摺 光緒三十年

直督袁奏游學日本畢業回國供差北洋各學生照章咨送考

驗摺

光緒三十年

川督錫奏選派監督率領諸生前赴日本學習師範速成科片

光緒三十年

川督錫奏選募官員士子分赴歐美各國學習路礦製造專門

實業片

光緒三十年

湘撫趙奏遣派學生往美比兩國學習礦業片

光緒三十年

出使美國大臣伍咨請另換游學合格護照文

光緒二十七年

外務部劄自備資各學生不准入士官學校文

光緒二十九年

外務部咨送出洋學生漢洋文護照文

光緒三十年

出使日本大臣楊咨各省咨送學生務取保狀以免流弊文

光緒三十年

[illegible]

約章成案匯覽乙篇卷三十二下

成案

游學門

總署奏遵議派員攜帶學生出洋肄業應辦事宜摺

同治十

一年

奏為遵

旨議覆恭摺仰祈

聖鑒事原任大學士兩江總督曾國藩協辦大學士直隸總督李

鴻章奏選派委員攜帶學生出洋肄業兼陳應辦事宜一摺

同治十一年正月二十二日軍機大臣奉

旨該衙門議奏單併發欽此欽遵由軍機處抄交到臣衙門據原奏內稱挑選學生出洋肄業固屬中國創始之舉所有攜帶學生委員非堅忍耐勞志趣卓越者不足以膺是選查有奏調四品銜刑部主事陳蘭彬運同銜江蘇候補同知容閔等上次摺內業經奏明均堪勝任應請

飭派陳蘭彬為正委員容閔為副委員常川駐紮美國經理一切事宜至挑選學生應在上海設局分批出洋與出洋之員呼吸相通查有鹽運使銜分發候補知府劉翰清熟悉洋務檄令總理滬局事宜各等語臣等查西人長技在於製器而其大要皆本於算法現欲取彼所長輔我所短自非選材前往

學習未易得其要領所選學生年皆幼穉自須委員常川約束在滬挑選分批送往外洋亦須有人經理所有請派委員陳蘭彬容閔劉翰清等分別常駐美國及在滬設局互相商辦各專責成應如所議辦理惟查開列應辦事宜清單第一條內開挑選學生以十二歲至二十歲為率第二條內開在洋肄業以十五年為率中間藝成後游歷兩年以驗所學然後回至內地各等語臣等查所選學生以十二歲計算至十五年藝成後回至中國時已二十七八歲若以二十歲計算則肄業十五年回至中國時已及三十六七歲其家中父母難保必無事故且年進二十再行出洋肄業未免時過後學

難望有成應請酌定自十二歲至十六歲為率並剔除親老
丁單之學生毋庸挑選外其挑選出洋者亦應隨時考驗所
學或有不及十五年而已有成效及遇有事故者准其報明
由該委員確實查核酌准送回且學生一百二十名之多在
洋十五年之久亦難保無因病出缺等事應如何辦理之處
亦須議及其挑選出洋各學生姓名籍貫三代履歷應飭該
委員造具清冊申報該督等轉咨臣衙門存案以備查核又
第四條內開恭逢三大節及朔望等日由駐洋委員率同在
事各員以及諸學生等望

開行禮等語所議甚是臣等並擬令在洋局恭設

至聖先師神位駐洋委員率同在事各員以及諸學生一體行禮
其餘各條應如所議辦理所有臣等遵議曾國藩等遵派委
員攜帶學生出洋肄業兼陳應辦事宜各緣由理合恭摺具
奏伏乞

聖鑒謹

奏 同治十一年正月 日奉

硃批依議欽此

北洋大臣李奏選華弁出洋習藝並洋弁給獎片 光緒二年
再 臣遵

旨籌布海防迭經奏欵定購西洋新式後膛鎗礮分發各營督飭

操練並轉託德國克鹿卜礮廠代僱德國都司李勦協來津
訂立合同議明三年為期教習克鹿卜後膛鋼礮該都司悉心
指授礮隊操法日臻嫻熟現屆期滿銷差回國由臣優給川
資並商令李勦協帶同花翎游擊卞長勝等七人赴該國武
學院講習水陸軍械技藝俟學成回華再分撥各營教練以
期漸開風氣李勦協性情忠篤與卞長勝等相習已久慨然
允行業與議定章程飭卞長勝等會同李勦協於三月二十
一日由津附搭輪船起程竊維外交之道與自固之謀相為
表裏德國近年發奮為雄其軍政修明船械精利實與英俄
各邦並峙臣前晤該國駐京使臣巴蘭德謂中國如派人前

往學習船政軍政彼國必當盡心教導是該國素敦友誼亟應及時聯絡師彼長技助我軍謀近年閩滬各局奏派學生赴英美等國游歷肄業無非為實事求是力圖自強起見茲臣所派游擊卞長勝等久歷行陣素諳洋器更令出洋精求博覽兼有李勣協援引照料徧赴德國各廠局軍營及礮臺兵船切實考究以增益其所不能似亦造就人才之一法所需出洋用費應在海防經費內核實支銷其德國都司李勣協盡心教練著有成績擬請

旨賞給二等寶星佩帶回國以示優異除由臣函屬德國公使巴蘭德轉致該國兵部外務大臣妥為照護並飭商總理衙門

仍將出洋員弁銜名籍貫造冊咨送外理合附片陳明伏乞
聖鑒謹

奏 光緒二年四月初二日奉

旨著照所請該衙門知道欽此

北洋大臣李奏調回管帶幼童駐洋肄業人員請獎摺

光緒

四年

奏為調回管帶幼童駐洋肄業人員請

旨優獎以示鼓勵恭摺仰祈

聖鑒事竊臣於光緒元年四月奏派工部候補主事區謨良出洋
會同原派委員容閱經理幼童肄業各事當即創委攜帶第

四批幼童赴美國哈富地方居住照料各童學習文藝查升
任宗人府府丞陳蘭彬原與容閔同派管帶學生駐美國旋
因總理各國事務衙門議辦古巴招工章程檄調陳蘭彬回
京維時以幼童肄業事宜關係緊要遴派區謬良速往接辦
由臣奏明請

旨飭下總理衙門暨工部仍照出差人員向例辦理如有成效從
優酌保以示鼓勵在案現陳蘭彬容閔均奉

命駐紮美日秘三國出使大臣已於九月初三日在美都呈遞

國書接陳蘭彬來函俟與美國外部商設金山領事辦有端倪
即須前往日秘兩國容閔來函呈請交卸駐洋肄業局務該

局原派總辦二員目下各童均已考進書院事務較少既有正副兩使駐紮美國不能置此局於度外其總辦可酌量裁減俾事權歸一以示責無旁貸比與陳蘭彬等往返函商意見相同查有保升主事內閣中書容增祥在美經管肄業充當教習已閱七年洋文洋語具有規模風土人情亦所熟習陳蘭彬等已就近奏調派充駐美參贊若令兼任管帶學生必可得力參贊事務稍簡副使容閔既常駐美京華盛頓參贊容增祥即可常駐哈富兩處鐵路相通輪車往來朝發夕至哈富有事容閔可來相幫華盛頓有事容增祥可暫去相助兩人素稱浹洽自無齟齬之慮主事區詒良已離原衙門

四年應仍調回工部當差該員遠涉重洋志趣堅卓督率各生徒肄習洋學漸得門徑附入各書院益求精進著有成效自應從優酌保以符原議惟該員係屬部曹核與吏部現定章程頗有窒礙若照尋常勞績僅予加級升銜殊不足以資鼓勵其應如何優獎之處伏候

聖裁所有調回駐洋人員仰懇

天恩從優給獎緣由謹會同恭摺具陳伏乞

聖鑒謹

奏 光緒四年十一月二十九日奉

旨區謬良著免補主事以員外郎即補該衙門知道欽此

北洋大臣李奏派往外洋華弁學成回華給獎摺 光緒五年
奏為派往德國軍營學習兵法技藝武弁期滿陸續回華現籌
分撥親軍哨隊教練恭摺具陳仰祈

聖鑒事竊光緒二年三月間教練礮隊德國人李勣協期滿回國
經臣在於海防各營內遴選年力少壯之游擊卞長勝等七
弁商令李勣協帶赴該國武學院講習陸軍技藝俟學成回
華再分撥各營教練以期漸開風氣當經議定章程三年為
期籌撥經費飭令由津起行附片具奏奉

旨著照所請該衙門知道欽此旋以卞長勝等赴德學藝未派監
督通道員李鳳苞監督福建船政局學生赴英法學習駕駛製

造各事復經飭令李鳳苞接三個月一次由輪車馳赴德國
兼查卞長勝等功課並請總理衙門照會德國駐京公使知
照於二年十一月選派閩廠學生出洋學習摺內

奏明在案計自卞長勝等奉派赴德即由駐京德國使臣巴蘭
德之兄予告提督巴蘭德商明該國兵部派入斯邦道第四
營交哨官德羅他妥為安插增給經費延師指授旋因卞長
勝王得勝朱耀彩三弁氣體稍弱改派博洪麗習藝三年春
調赴維廉士哈芬海口學習水師復調溪耳海口四年春因
卞長勝朱耀彩性情較浮學業未能精進先調回華楊德明
查連標袁雨春劉芳園四弁仍在斯邦道步隊營內應經巴

蘭德及德羅他妥為照料視同子弟每歲由該軍總統帶赴五宮宴會第一年先習練手足及演鎗各法兼習德語第二年隨着林操所演迎敵設伏及繪地圖排演各法第三年習演帶排隨同林操兼習文書上年十月另延哨官西鐸教授布陣各法該弁等漸有會心今春三年期滿經臣緘商駐德使臣李鳳苞暫展限期今該弁等詳考一哨調度各法以窺步隊之竅要自夏徂秋該弁等晝則隨操晚則聽講凡鎗隊理法皆能領悟六七月間又各備馬匹隨同礮隊大操以觀配搭步隊相濟為用之妙大操既畢新兵換防無藝可學除王得勝一弁仍留柏林都城延師專教楊德明一弁攻苦成

疾暫在斯邦道就醫外其查連標袁雨春劉芳圖三弁由李鳳苞咨送回華據稱德國陸軍甲於天下而步隊尤精於馬礮各隊其得力全在每日林操熟演料敵應變之法每年夏秋大操熟演露宿野戰攻守之法其法備於一哨擴而充之可營可軍該弁等隨閱林操大操耳濡目染最為親切惟德國兵官向例皆選世家子弟聰穎者入武學院讀書三五年考取中式入營學習或步或馬或礮仍不能兼今查連標等洋文既未童習強記力學三年有餘雖未能遽臻彼中兵官之詣而較之教練洋員固已有過而無不及該弁等向習步隊頗已完備彼國毋以泛鶩為戒自應咨送回華以免閒曠

等語臣復面加考驗該弁所習步隊技藝紀律尚為嫻熟出洋肄業日久艱苦備嘗學有心得據李鳳苞咨稱該弁等在洋均各謹守禮法見重於外人營哨教習均具考語信憑是其材器頗堪造就擬懇

天恩將藍翎守備銜儘先千總袁雨春留於直隸以守備儘先補用並

賞換花翎軍功查連標劉芳園二弁均

賞給五品藍翎留於直隸以千總儘先補用以示優獎而資傳習現擬於親軍營內先行挑選哨隊仿照德國一哨之制交該弁等依法教練並令新募德國兵官漢納根隨時察看督率

講究日後將學成者分派各營充當教練漸次擴充成效必
多於海防不無裨助除咨明總理衙門外所有派往德國學
習兵法技藝武弁期滿陸續回華緣由理合恭摺具陳伏乞
聖鑒謹

奏 光緒五年十一月初一日奉

旨袁雨春等均著照所請獎勵該衙門知道欽此

北洋大臣李奏德國提督教道華弁出力給獎片

光緒五年

再據出使德國大臣兼肄業監督李鳳苞咨開德國予告提
督巴蘭德係駐京公使巴蘭德之兄當光緒二年選送七弁
赴德肄業時該提督即導見該國兵部海部並託斯邦道提

督及伊婿營官德羅他分派教導視同子弟迄今三年鉅細畢周勤勞益著請

奏賞該提督寶星以示獎勵等語查光緒三年十月德國兵官德羅他教練盡心經臣奏奉

諭旨賞給寶星欽遵在案該提督照料周妥事同一律前據李鳳苞函稱該提督亟望

恩賞寶星以為榮寵自應由臣飭局仿造二等金寶星一顆齎交駐京使臣巴蘭德轉寄傳

旨賞給以示懷柔而資激勸除咨請總理衙門照會巴蘭德知照外理合附片陳明伏乞

聖鑒謹

奏 光緒五年八月初六日奉

旨該衙門知道欽此

北洋大臣李奏德國武員教導華弁出力給獎片

光緒五

年

再臣迭准李鳳苞咨稱查連標等赴德肄業先經駐京德國使臣巴蘭德之兄予告提督巴蘭德轉託斯邦道提督及營哨教習現在期滿學成回華接准該提督巴蘭德函稱斯邦道教隊出力之步隊親軍第一營三等提督波蘭撒爾第四營頭等總兵官薩呢則第四營內頭哨二等總兵官哈克威

擬懇邀請

奏獎由駐京使臣巴蘭德轉遞前來臣查光緒三年十月及本年八月德國兵官德羅他與提督巴蘭德或盡心教練或照料周妥經臣先後奏奉

諭旨賞給寶星欽遵在案今該兵官三員教隊出力事同一律既據巴蘭德函懇給予獎敘自應由臣飭局做造二等金寶星一面發給該提督官波蘭撒爾並造三等金寶星二面分給該總兵官薩呢則哈克威配帶均交駐津德國領事傳

旨賞給以酬勞勩除咨請總理衙門照會巴蘭德知照外理合附片陳明伏乞

聖鑒謹

奏 光緒五年十一月初一日奉

旨該衙門知道欽此

謹按嗣據德國巴使函稱薩哈兩員係頭二等總兵請改
給二等寶星提督波蘭撒爾請改給頭等寶星均經 奏
明換給

北洋大臣李奏閩廠生徒肄業期滿回華華洋教導出力各
員給獎摺 光緒七年

奏為前派船政生徒出洋肄業在事華洋各員始終勤奮擬懇
天恩給獎以示鼓勵恭摺仰祈

聖鑒事竊_臣等接准出使德國大臣兼肄業監督李鳳苞咨開前因福建船政選派駕駛製造生徒出洋肄業經該大臣偕同洋監督日意格隨員馬建忠文案陳季同繙譯羅豐祿等於光緒三年三月內到洋習率肄習三年陸續學成咨送回華其展限補習四月者扣至六年八月亦一律完畢分別留洋遣回在案溯查出洋生徒在船時各限功課不令閒曠既抵英法專延洋師補教以充根柢一面偕同洋監督面商英法部臣將在英之駕駛生先派三生登鐵甲船九生入格令尼次官學續將官學八生訓入鐵甲船學習歷赴地中海大西洋美利堅阿非利加印度洋等處學習操防排布迎禦之法

迨離船後又專延教習補授電氣鎗礮水雷各法具有船主
憑單給執並照章酌量游歷上厰以廣見識是駕馭諸生在
船學習不止原定章程分班五六十人上鐵甲船已也其在法
之製造生先送四生入削浦官學五生入多廊官學其餘派
入汕荅佃官礦學及科魯蘇民厰分習開採烹鍊鑄等事
旋經商明部臣將汕荅佃處五生入巴黎官礦學其製造藝
徒初派民厰補習工藝續經分送賽隆及向海士登官藝學
該生徒等各照官學所定章程專門洋師按年甄別給執官
憑並酌量游歷英法比德各國新式機器船械各厰以資考
訂凡有傳習各生徒俱已竟功雖天資不一造就有深淺之

殊而按章督課實與諸官學卒業之洋員無所軒輊其製造者能放手造作新式船機及應需之物駕駛者能管駕鐵甲兵船調度布陣其製造如魏瀚陳兆翱鄭清濂林怡游開採鎔煉如羅臻祿林慶升駕駛如劉步蟾林泰曾蔣超吳方伯謙薩鎮冰頗為優異其餘加以陶鎔均可成器皆有考取確據委與原定章程辦有成效之語相符苟非在事各員指臂相資未克臻此所有出力各員除正一品銜前船政監督日意格屢稱渥荷

隆恩不敢再邀獎敘及隨員候補道馬建忠業經

奏獎襄辦文案縣丞錢德培不及三年存記勞績外其文案陳

季同緒譯羅豐祿出使德國二等參贊官徐建寅幫辦監督
洋員斯恭塞格洋文案商氏邪等五員辦理文案繙譯襄助
華洋監督移調生徒料管妥協及偕同前赴各廠考求機器
製造採鍊並查察功課兼習律例公法化學政治等事均能
始終勤奮辦理有成應請照案

奏獎等因前來臣等伏查船政生徒派往英法各國肄業分入
官學官廠於製造駕駛各事均有心得該監督等周歷查察
調護維持實心實力使諸生學業進益已多而隨員等兼習
各學疊經考試取中奔走照料亦著勤勞該生徒等既經學
成回華自應照案給獎以示鼓勵此次出力之監督二品頂

戴三品卿銜記名海關道李鳳苞擬請

賞戴花翎留閩補用都司陳季同擬請免補本班以游擊仍留原省補用並

賞加副將銜應選主事羅豐祿擬請以同知不論雙單月歸部選用並

賞加四品銜候選道徐建寅擬請

賞加三品銜至三品銜一等寶星前福建船政副監督洋員斯恭塞格擬請

賞給總兵銜洋員商氏邪擬請

賞給三等寶星並加四品軍功俾資觀感而策後效所有帶領船

政生徒出洋肄業在事華洋各員始終勤奮擬請獎勵緣由
謹合詞恭摺具陳伏乞

聖鑒謹

奏 光緒七年正月二十五日奉

旨李鳳苞等均著照所請獎勵該衙門知道欽此

北洋大臣李等奏續選閩廠生徒出洋摺

光緒七年

奏為續選閩廠學生出洋肄業以儲人才而擴進境恭摺仰祈

聖鑒事竊臣鴻章於光緒二年十一月會同前南洋大臣沈葆楨

等奏明選派閩廠前後學堂製造學生十四名藝徒四名駕

駛學生十二名分赴法國官廠及英國水師學堂鐵甲兵船

學習製造駕駛之方及推陳出新練兵制勝之理所需經費
由閩省額撥南北洋海防經費內酌提動用旋議定閩省釐
金項下籌銀四分之一閩海關洋稅及船政經費項下各籌
撥銀四分之一按照章程分年匯解該學生等出洋後均能
悉心考究窺見門徑雖所造深淺不同尚不為故步所域多
已學成期滿陸續回華其駕駛學生出色者則有劉步蟾林
泰曾等製造學生出色者則有魏瀚陳兆翱等經臣等量材
器使或派管駕蚊船快船或在船政差遣及派往外洋為鐵
甲船監工其餘亦分任要務各効所長惟現值整頓水師研
精船械規模日擴事事需才尤覺不敷分布臣鴻章於光緒

五年會同沈葆楨奏明閩廠出洋生徒應予蠲聯就學以儲後起之秀而備不竭之需奉

旨允行在案查船政前後學堂生徒初次選擇三十人出洋已拔其尤其續入學堂者年資稍淺遴選較難然育才之要宜使迭出而不窮日新之功不可一得而自畫臣鴻章與臣兆棠往返咨商擬定續選前學堂學生八名後學堂學生六名出洋肄業並擬分撥經費銀十萬兩陸續匯解出使大臣兼肄業監督李鳳苞收支並請由出使英法大臣曾紀澤會同督率照料惟查後學堂學生內有許北箕等四名先經臣鴻章調赴天津派充水師學堂教習及威遠練船教練水手皆有

要差礙難遽令出洋現計後學堂學生僅有二名合之前學堂學生八名共有十名先行儘數派員送至香港登舟出洋餘俟選擇得人續派前往所需經費仍應由福州將軍及福建督撫臣與臣兆棠查照成案分年勻撥接濟所有續選闕廠學生出洋肄業緣由理合會同恭摺馳陳伏乞

聖鑒謹

奏 光緒七年十月十四日奉

旨該衙門知道欽此

總署奏遵議遴選生徒游學日本事宜片

光緒二十五年

再准軍機處鈔交御史楊深秀片奏泰西各學自政治律例

理財交涉武備農工商務礦務莫不有學日本變新之始遣
聰明學生出洋學習於泰西諸學燦然美備中華欲游學易
成必自日本始聞日本大開東方協助之會願智吾人士助
吾自立招我游學供我經費以著親好之實經其駐使矢野
文雄函告譯署伏乞

飭下總署速議游學日本章程選舉貢生監之聰敏有才年未三
十者在京師聽人報名由譯署給照在外聽學政給照等因
光緒二十四年四月十三日奉

旨著總理各國事務衙門議奏欽此查本年閏三月間准日本使
臣矢野文雄函稱該國政府擬與中國倍敦友誼藉悉中國

需才孔急倘選派學生出洋習業該國自應支其經費又准該使臣來署面稱中國如派肄業學生陸續前往日本學堂學習人數約以二百人為限經臣等備函致謝並告以東文學堂甫經設立俟酌妥辦法再行函告該使臣亦稱須預議妥章等語近年以來日本講求西學大著成效又與中國近在同洲往來甚便既經該國函請派往游學臣等公同商酌擬即妥訂章程將臣衙門同文館東文學生酌派數人並咨行南北洋大臣以及兩廣湖廣閩浙各督撫就現設學堂中遴選年幼穎悟粗通東文諸生開具銜名咨報臣衙門知照日本使臣陸續派往即由出使日本大臣就近照料無庸另

派監督各生應支薪水用項由臣衙門核定數目提撥專款
匯交出使大臣隨時支發該御史所請在京聽人報名由譯
署給照在外聽學政給照未免漫無限制應毋庸議所有遵
議緣由理合附片具陳伏乞

聖鑒訓示謹

奏

出使韓國大臣許奏學生出洋不准驟保道府片

光緒二十七年

再出使各國隨帶學生三年報滿與參贊各員均照異常勞
績請獎在定章初意原欲鼓勵以幾其成且同一遠涉重洋
亦未便於學生獨有歧視惟派令學習之人甫屆三年報滿

府佐等官便可保至道府此端一開必滋淺當之弊啟躁進之心於人才風氣似有關係即如駐韓使署學生章家駒經前任使臣徐壽朋咨調來韓原係分省試用布政司理問近加捐同知若照向章請獎自應保升知府臣因該員出洋雖屆三年甫經筮仕即膺方面未免過優且查各國出使保案亦無學生徑保知府之事故此次開單

奏獎請仍以同知歸候補班儘先補用擬請

飭下外務部明定限制嗣後隨帶學生非經出使大臣拔充繙譯隨員及歷屆海保者概不准驟保道府庶於激勵人才之中寓慎重名器之意是否有當謹附片陳

奏伏乞

聖鑒謹

奏 光緒二十七年十一月二十日奉

硃批外務部知道欽此

專使日本大臣載奏查覆日本游學生聚眾滋事情形摺

光緒二十八年

奏為遵

旨確查據實具

奏恭摺仰祈

聖鑒事竊奴才於七月初六日行抵美洲紐約海口接准出使大

臣伍廷芳面交外務部轉到密電內開七月初三日奉

旨有人奏前赴日本游學生有聚眾至使館肆鬧情事經日本巡警兵彈壓始散學生聚眾滋事聞入使館應從嚴懲以警刁風出使大臣蔡鈞不洽輿情激成巨變請嚴予懲處參贊銓林任性妄為士心不服應一併撤回等語著載振按照所參各節確切查明據實具奏毋稍徇隱欽此 奴才旋於七月十五日至美洲英屬之溫哥華埠乘坐輪船於二十九日抵日本橫濱海口即日前赴東京接見日本各部大臣及中東紳商時作為間譚隨時採訪並詳詢日本外部大臣小村壽太郎知近年中國游學日本學生人數日多由各省督撫咨送到日者為

官派學生其自備資斧東來游學者謂之自費學生向皆安分守己幼學精進日人頗稱道之分派同文宏文成城等學校安插肄業漸升至大學及專門學校分類講肄以期有成惟成城學校為士官初階所習以武備為主非由駐日使臣保送不得自請投學諸生目擊時艱意圖振奮頗有願入成城學校者故無論官生自費生前均保送有案此次有自費學生鈕瑗等五人願入成城學校適有候補京堂吳汝綸經大學堂派令考查學校來日該生等即浼其商請蔡鈞具文保送蔡鈞令各生自行環保即允轉送諸生以蔡鈞並無難色遂聯同志增至九人書具互保甘結送入使署蔡鈞以人

數太多將該生等原結送至日本參謀部署該部以與向例稍為不符函復該大臣請其親自具函保送蔡鈞以時值海暑放假參謀部大臣福島避暑他出未即舉辦諸生疑蔡鈞有意阻撓於六月二十四日已初約同江蘇舉人吳敬恆孫揆均等二十餘人赴使署請見蔡鈞以其人衆未肯接見該生等忍餓鵠立日昃不散蔡鈞即遣人邀吳汝綸及日本外部繙譯小村光太郎到署勸解並招警察官至使署彈壓諸生見警察官入署以為脅已未免口出重言堅不肯退直至夜分蔡鈞即囑警兵將諸生赦入警署於是人情洶洶或謂其辱及斯文或謂其自招警兵入署有失

國體次日復有學生數十人同赴使署蔡鈞已先期囑令警兵
守門大半標諸門外其已入者復經警兵扶掖而出此事始
終本末大畧如此小村壽太郎言之至詳即証以蔡鈞宣諭
諸生刊印告示亦多符合小村並謂蔡鈞此次於諸生呈請
入學不肯遽爾保送係為慎重起見辦理尚無不合而諸生
平素安靜勤學並非有意滋事之人偶因求見不獲彼此誤
會原其本心實可共諒祇以既有此段枝節不得不將吳敬
恒孫揆均二人遣送回華在吳敬恒等雖係事不干己而其
矜全同類舍己為人其情亦殊可憫現在諸生謹飭如常並
無缺望正當導其為學斷不可加以挫折致沮士氣奴才以

華民游學日衆其束身自好篤志向學者固多然其中保無
有一二藉學為名隱圖煽惑弱冠生徒血氣未定或至誤入
歧途為患殊非細故與小村反覆討論小村復謂華生來學
多與本國學生雜居究竟華生祇有此數日本數萬生徒設
有此等情節豈不慮其漸染故管學大臣及監督教習於諸
生意旨趨向息息相關審察防閑極為精密斷不至稍有疏
忽尤不肯隱忍容留此理甚明可無過慮小村又謂吾亞人
民物產豈遜他洲所以不能與歐美爭衡者正坐人才缺乏
故造士之方日本視為至重我兩國唇齒相依教育初無歧
視往往因學堂向有定額至有舍日生以待華生者則中國

之愛護學生宜如何誘掖獎勸拭目以觀其成設以駐使事
繁不能隨時接見諸生周旋戒勉致有隔閡不妨選派博學
愛才之人充總監督駐紮是邦專司其事似亦兩全之術其
言切實和平所見尤中肯綮奴才致謝雅意并囑其加意維
持小村頗為欣納奴才復逐日接見官派自費學生多方勉
勵并以

朝廷需才孔亟期望海外諸生須臾不忘諸生負笈遠游

朝廷亦所深鑒如果學成回國豈肯負汝苦志惟諸生必須盡
心為學志趨端正方能成就遠大否則時乎不再實為諸生
深惜奴才勛勵至再諸生唯唯聽命或欣喜逾望或感激唏

噓甚有悲傷含涕不能仰視者奴才窺其神色舉動率皆循謹安詳尚無桀驁品陵之氣可期相安無事不至更生變故方今各省建立學堂培養士類風氣初開收效較遠惟此游學一事實為當務之急斷難因噎廢食自過生機應否飭下管學大臣遴派總監督與日本政府商訂章程妥為調護之處出自

聖裁至原奏所稱參贊銓林任性妄為士心不服一節密加訪察并無實據茲謹就奴才間見所及縷晰上陳不敢有所徇隱所有遵

旨查覆緣由理合恭摺具陳伏乞

皇太后

皇上聖鑒謹

奏

北洋大臣袁奏遣派學生赴日本肄業片

光緒二十八年

再上年八月初五日奉

上諭造就人才為當今急務前據湖南湖北四川等省選派學生
出洋游學用意甚善著各省督撫一體仿照辦理務擇心術端
正文理明通之士前往學習一切專門藝學認真肄業實力講
求等因欽此竊惟當今時局以講求武備為先整頓戎行以遴
選將才為急臣觀近日各營將弁其樸誠勇敢者尚不乏人

然氣質半屬粗豪文理尤多闕昧其於軍謀戰畧平時既少
研求一旦臨戎往往張皇失措非細故也查歐美東洋各國
於行軍練士之法悉心考究日新月異而歲不同故能迭為
長雄潛消外侮今中國兵制徒守湘淮成規間有改習洋操
大抵襲其皮毛未能得其奧妙欲求因時之宜以收折衝之
效自非派員出洋肄習不為功顧歐美遠隔重洋往來不易
日本同洲之國其陸軍學校於訓練之法備極周詳臣部武
衛右軍學堂諸生現已三屆畢業之期雖規模頗有可觀而
諸練猶有未至自應及時派往東洋肄習庶學成返國堪備
干城禦侮之資似變法圖強無有要於此者當飭該堂總辦

挑選學生五十五名派監督一人率之前往日本入陸軍學
堂學習一切課程庶廣益致精速收成效業於本月十一日
啟行赴東臣於該學生瀕行時各發訓條勗以尊
君親上專心嚮學並嚴諭該監督認真約束俾守範圍以期敦不
虛糜學皆可用似於

國家整軍經武造就人才之道不無裨益所有遵

旨遣派學生赴日本陸軍學堂肄業緣由除咨出使日本大臣蔡
鈞隨時約束照料並咨明外務部外理合附片具陳伏乞

聖鑒謹

奏

外務部奏請簡派日本游學生總監督摺

光緒二十八年

奏為前赴日本游學生人數日繁請

派總監督一員專司其事以重責成而資督率恭摺仰祈

聖鑒事光緒二十八年八月二十一日准軍機處抄交專使大臣
載振查覆日本游學生聚眾情事摺內奏稱游學一事實為
當務之急斷難因噎廢食自過生機應否

飭下管學大臣遵派總監督與日本政府商訂章程妥為調護之
處出自

聖裁等語奉

硃批外務部知道欽此欽遵到部臣等查近來屢奉

詔飭各省選派學生出洋肄業並准自備資斧前往士皆競奮於
學不憚負笈出游日本地近費省趨之者尤衆其官派學生
各省或有委員監督或無委員監督自費學生則自保送入
學後並無約束情誼既難聯絡規制亦未整齊出使大臣雖
有稽查照料之責而交涉事繁兼顧實難周到該學生等分
疏勢隔且慮下情無以上達一步猜嫌轉生糾葛自非特設
專員總司其事不足以端正趨向策勵通才仰副

朝廷作育裁成之至意此次載振過日本時見其外部大臣小
村壽太郎即以選派博學愛才之人充總監督駐紮是邦為
言臣等屢晤日本駐京使臣內田康哉及其高等師範學校

長嘉納治五郎來京皆述游學生各節望中國派員監督要訂章程俾各學生免誤方向學業有成以備將來任用其詞意俱甚切摯聯友邦維持之誼慰多士仰望之心責成尤在得人造就方有實效臣等公同遴選查有四品銜臣部員外郎汪大燮品端學裕器識閑通隨使出洋辦事妥洽於日本游學生情形尤為稔悉擬請

派為總監督前往駐紮所有官派自費各學生統歸管轄令商日本外部文部參謀部妥定章程隨時認真經理遇事徑達臣部應請將該員

賞給卿銜由臣部刊給木質關防一顆文曰大清管理赴東洋游

學生總監督之關防以昭信守准其酌帶隨辦文牘及繕譯
共二三員所需薪水用項每歲准支銀二萬兩由出使經費
內提撥三年期滿再行奏請更換隨帶人員屆時照出使章
程請獎如蒙

俞允即由臣部欽遵辦理所有臣等請

派總監督緣由理合恭摺具陳伏乞

皇太后

皇上聖鑒訓示謹

奏

外務部奏議覆四川籌提開缺選派學生出洋游學摺

光緒

二十八年

奏為遵

旨議

奏恭摺仰祈

聖鑒事准軍機處鈔交四川學政吳郁生奏請籌提間款選派舉貢生員出洋游學一摺光緒二十八年八月初九日奉

硃批外務部議奏欽此查閱原奏稱學堂興設之難一曰無款一曰無師二者相衡師範較難而通知西學者尤難蜀地偏僻乏才更甚自去歲奉

旨選派學生出洋風氣漸開士知墨守為非各屬舉貢生員等於

省城創設游學公會擬集資斧就學東瀛期於速成師範為
學堂教習之用合詞具稟請為立案並籌給津貼前來竊維
川省夙稱富庶風俗尚樸近則添埠通商開礦造路等事相
逼而來蚩蚩者不慮生計之將日蹙猶復輕聽謠言妄思排
外不開通其見識則禍患方滋開通見識在乎興學興學必
先求師範會通中西在乎游學游學必先取高材惟事久費
鉅寒士既無其力公家亦艱於用再四圖維祇有就地籌款
化私為公之一法查川省各州縣多有紳富捐設學田津貼
應試文武生童現在武科既停歲有閒款併為一用聚則見
多約計每年可提數千金又中富之邑津捐賓興等局時有

贏餘文昌宮各廟等會向多糜費或酌提奇零或量勸伙助
大縣中縣歲籌三二百金當尚不難此二項擬分飭各屬按
年清解名為游學經費彙存鹽道庫候撥學政衙門但任籌
催不管收放以清界限此籌款之大畧至選派學生出洋歲
以十人為限學以三年為期前者畢業後者繼往專取舉貢
生員志趣純正中學已優者由學臣選定再由游學公會紳
董出具切結方予批准按年給費並咨明使臣照料如出洋
後不知自愛行止乖謬由學臣查確撤回分別奏咨革懲其
學成得有憑照回籍者謹遵

諭旨照派出學生一體考驗獎勵惟應先在本省充當教習三年

由學臣考驗合格者再行咨送外務部此選派之大畧如奉
旨允行再詳定章程咨送外務部存案等語臣等查學堂創設經
費既苦難籌師範亦非易得今該學政擬就地籌款化私為
公選派志趣純正中學已優之學生出洋就學歲以十人為
限學以三年為期前者畢業後者繼往學成先充本省學堂
教習三年再行咨送考驗獎勵等辦法款出衆擎不糜公家
之費師能自得免借異地之才一切尚覺周妥可見施行果
能辦理認真將來成就者衆學堂不難普設人才益見蔚興
應請

旨准照所擬即行試辦並請

飭下該學政將籌款選派各章程詳加釐定咨送臣部覆覈立案
所有臣等遵議緣由理合恭摺覆陳伏乞

皇太后

皇上聖鑒謹

奏 光緒二十八年九月二十一日奉

硃批依議欽此

宗人府奏宗室子弟分別出洋游歷游學摺

光緒二十八年

奏為遵

旨擬請宗室子弟分別出洋游歷游學以開風氣恭摺仰祈

聖鑒事竊恭讀二十七年十二月二十三日

上諭交涉事宜最為重要現在振興庶政尤應博採所長出洋游
歷人員若能於各國政治工藝潛心考究切實講求庶幾蔚為
通才足備國家任使近來各省士子留心時務多赴各國學堂
肄業惟宗室八旗子弟風氣未開亟宜廣為造就著宗人府八
旗都統遴擇各旗子弟年在十五歲以上二十五歲以下志趣
正大資質聰明體氣強壯者造冊開送軍機處進呈聽候派員
覆覈挑選給資遣赴各國游學藉資歷練而廣見聞用副朝廷
圖治育才至意欽此臣等跪誦之餘莫名欽佩竊維時艱宏濟
重賴人才而人才振興尤資學問藉出洋以宏造就不獨宗
室八旗子弟聞風興起實為強弱一大轉機蓋當此創鉅痛

深羣知奮勉果能於各國政治工藝潛心考究精益求精今日之受制於人者異日或不為人所制然風氣必自上而開有表率乃有觀感故歐西各國親王莫不遠游外邦并多旅居肄業顧中國體制畧有不同宗室子弟如有願赴各國游學或游歷者無論已否授職當差應准隨時報名酌量遣往至自備資斧人員如果學成歸國擬懇

天恩俯准由本衙門奏請酌給獎敘以勵勤勞俾知懿親之貴尚不憚跋涉風霜則人人皆當奮勉現在京師及各省學堂甫議開辦收效尚遲此正可導其先機將來能得通才於交涉不無裨益臣等為時事需才起見是否有當恭候

聖裁所有宗室子弟擬請分別出洋游歷游學緣由理合恭摺具奏伏乞

皇太后

皇上聖鑒訓示謹

奏

管學大臣奏派學生前赴東西洋各國游學摺

光緒二十九年

奏為選派學生前赴東西洋各國游學恭摺具陳仰祈

聖鑒事竊臣伏讀光緒二十七年八月初六日

上諭造就人才為當今急務前據江南湖北四川等省選派學生出洋游學用意甚善著各省一律辦理務擇心術端正文理明

通之士前往學習學成領有憑照回華即由該督撫學政分門考驗咨送外務部覆加考驗奏請獎勵分別賞給進士舉人各項出身以備任用而資鼓舞等因欽此仰見

朝廷育才興學因時制宜之至意莫名欽服上年臣百熙於

召對時曾蒙

懿訓深以教習乏才為念當經奏陳京師大學堂宜派學生出洋分習專門以備教習之選計自開學以來將及一載臣等隨時體察益覺咨遣學生出洋之舉萬不可緩誠以教育初基必從培養教員入手而大學堂教習則尤當儲之於早以資任用查日本明治八年選優等學生留學外國至明治十三年

留學生畢業歸國多任為大學堂教員迄今博士學士人才
衆多六科大師取材本國從前所延歐美教員每科不過數
人去留皆無足輕重而日本之留學歐美者尚源源不絕焉
此其用心深遠可為前事之師臣等忝膺學務夙夜焦思因
知中國大學分科照目前物力士風而論求其規制完備程
度高深恐非三四年所能猝辦而仰窺

聖明垂意之殷環顧舉國屬望之切精神所注終底於成亟應多
派學生分赴東西洋各國學習專門以備將來學成回國可
充大學教習庶幾中國辦理學堂尚有不待借材操縱自如
之一日早為之計應用無窮及今不圖後將追悔現就速成

科學生中選得余榮昌曾儀進黃德章史錫倬屠振鵬朱廡
文范熙壬張耀曾杜福垣唐演馮祖荀景定成陳發檀吳宗
棧鍾賡言王相齡王舜成朱炳文劉成志顧德鄰蘇潼朱深
成寓周宣何培琛黃藝錫劉冕執席聘臣蔣履曾王曾憲陳
治安等共三十一人派往日本游學定於年內起程俞同奎
何育杰周典潘承福孫昌烜薛序鏞林行規陳祖良華南圭
鄧壽倌程經邦左承詒范紹濂劉光謙魏瀚栢山等共十六
人派往西洋各國游學定於年外起程該學生等志趣純正
於中學均有根柢外國語言文字及各種普通科學亦能通
曉大凡置之莊嶽假以歲時決其必有成就此外尚備取數

人防派定學生臨時或有疾病等事可以更易日本學費輕
省往返近便故派數較多頗慮其沾染近時游學惡習臣等
接見自日本來京之中外各員一再詳究僉稱凡議論囂張
任性妄為者名為出洋學生實則閒游生事並未一日就學
其真在各學校肄業生徒大都循理守法力求進步等語近
詢戶部右侍郎臣鐵良新在日本所見大概相同臣等仍當
嚴定規條豫防流弊於學生臨行時以忠愛大義學成致用
諄諄訓勉學期約以七年為率西國十六人統計需費十萬
餘兩日本三十一人統計需費九萬餘兩而川資等項尚不
在內極知常年鉅款力有不支然為培才起見自當勉為籌

畫擬在大學堂實存項下按年提撥開單奏銷其餘一切事宜悉遵外務部議覆出使各國大臣籌議出洋學生章程及湖廣督臣張之洞奏定約束獎勵各章程斟酌辦理除咨部並咨行出使各國大臣隨時照料考察外所有選派學生出洋游學緣由理合恭摺具陳伏乞

皇太后

皇上聖鑒謹

奏

出使日本大臣兼管游學生總監督楊奏請酌調人員專司

學務片

光緒二十九年

再查外務部

奏定章程游學生總監督准其酌帶人員隨辦文牘三年期滿
照出使章程請獎等因通行遵照在案現在各省官費自費
生到東游學者愈眾以致學務之繁倍於前任雖經奴才飭
令使署參隨各員幫同辦理然無專員照料一切尚恐有不
周之處自應遵照章程調員委用以專責成查有江西即用
縣何壽朋廣州駐防舉人保熊韜堪以派委專司學務如蒙
俞允即由奴才咨呈外務部轉咨各該省飭令該員等迅速到差
所有總監督公牘仍飭令參贊官馬廷亮汪度暨使署隨員
幫同辦理以昭慎重理合附片具陳伏乞

聖鑒訓示謹

奏

署江督張奏選派水陸各師學堂學生出洋肄業片

光緒二十九年

再光緒二十八年九月初四日欽奉

上諭朕欽奉

慈禧端佑康頤昭豫莊誠壽恭欽獻崇熙皇太后懿旨前經降旨飭令各省調派學生出洋游學以資造就聞近來游學日本者尚不乏人泰西各國或以道遠費多資送甚少亟應廣開風氣著各省督撫選擇明通端正之學生籌給經費派往西洋各國講求專門學業務期成就真才以備任使將此通諭知之欽此欽

遵在案伏查中國所最缺少者莫如水陸師將校之才水師以英國為最著陸師以德國為最優惟是游學西洋道遠費重語言文字扞格難通非先於西文畧窺門徑而於中學稍具根基者就學殊難獲益茲於江南省城水師學堂選取畢業學生曾習英文者八人派往英國水師學堂以四人專習管輪之學以四人專習駕駛之學每年約需經費銀二萬餘兩在於通州紗廠官本生息奏定存備出洋游學經費項下如數動撥又於陸師學堂選取畢業學生曾習德文者八人派往德國陸師學堂分習步騎砲工各門學問每年約需經費銀二萬兩在於司庫籌備要政經費各款項下如數動撥

其往返川資治裝各項統由司於要政經費項下湊足各學生均屬青年有志資性可造之才經臣諄切訓勉到外國後務須立品端重不忘

君國勤求實學交結正人期於學成回國各有專長以備任使此次派往暫以三年為限至三年滿後應否即令回華抑或再令留學以期大成之處應俟屆時體察中國需用緩急情形學生志業再行斟酌辦理除將該學生等姓名咨明外務部查考並分咨駐英使臣張德彝德使臣蔭昌就近派員督察料理外理合會同江蘇撫臣恩壽附片具陳伏乞

聖鑒謹

奏 光緒二十九年二月二十六日奉

硃批外務部知道欽此

署鄂督端奏派學生前赴比國游學摺 光緒二十九年

奏為選派學生前赴比國學習實業恭摺具

奏仰祈

聖鑒事竊臣於本年迭次選派湖北各學堂學生前赴德美俄法
各國游學均經先後

奏明在案查近日泰西各國講求實用教育以為富強之基其
實業學校如工業商業農林路礦無不精研實驗各有專門比
利時國在歐洲西部其教育工業技術製造礦業各有專修

學校他如商業則有高等專門學校農業則有高等農會礦業及其餘工業又有實業公所故其工藝則機械最精礦產則煤鐵最富其鐵路通法國巴黎長六千餘里路礦之學尤為他國所推許中國地大物博實甲環球惟於工藝素少講求器械未能自製開礦修路等事無不僱用洋匠以致事權旁假大利難興近年

朝廷作育人才振興實學歷年欽奉

諭旨諄諄以講求實用為主比國實業較精學費較省誠能多派學生前往肄習他日學成而歸上足以備任用下足以裕資生實於大局不無裨益臣謹就湖北各學堂學生選得楊蔭

葉吳國良汪鍾嶽羅葆寅胡秉柯魏宸組賀子才史青黃大
偉祿崇姚業經楊循祖鄧鳳池劉祥雲許熊章喻毓西程光
鑫劉蔭蓓李光駟王治輝胡珣年李以祐陳寬沅李彪等二
十四人派赴比國學習實業即令派充德國留學生監督戶
部員外郎閻海明兼充比國游學生監督帶同前往該學生
等年力正富通曉方言臣於臨行時舉前大學士曾國藩所
云以剛大作忠義之氣以精思窮製造之術二語相諄勉務
使盡心研究克底於成以仰副

朝廷造就人才力圖富強之至意至川資學費所需甚鉅然時
局艱危需才孔亟不得不勉為其難當由臣督飭司道各局

極力設籌以備應付其餘一切事宜悉遵照外務部議定章程辦理除咨外務部大學堂並咨行出使比國大臣隨時照料考察約束外所有選派學生前赴比國學習實業緣由謹恭摺具

奏伏乞

皇太后

皇上聖鑒再湖北巡撫係臣本任毋庸會銜合併陳明謹奏

署鄂督端奏派學生前赴美德俄三國游學摺

光緒二十九年

奏為遵

旨選派學生前赴美德俄三國游學恭摺具

奏仰祈

聖鑒事竊臣伏讀光緒二十七年八月初六日

上諭造就人才為當今急務前據江南湖北四川等省選派學生
出洋游學用意甚善著各省一律辦理務擇心術端正文理明
通之士前往學習學成領有憑照回華即由該督撫學政分門
考驗咨送外務部覆加考驗奏請獎勵分別賞給進士舉人各
項出身以備任用而資鼓舞等因欽此仰見

朝廷培養人材振興實學之至意查同治年間美國所立條約
第七條內載中國人欲入美國大小官學學習各等文藝須

照相待最優國人民一體優待等語維時前大學士李鴻章與曾國藩會奏選派聰穎子弟赴美肄業又選派游擊卞長勝等赴德肄習軍械技藝又與船政大臣會奏選派閩厝生徒分赴英德官厰學堂及兵船學習均經奉

旨允行在案近日中國人士怵於日本之自強往往徑赴東洋游學其不由官派自備資斧者亦復不少人類既衆學術易歧實則日本學制亦皆步武泰西惟其厚視同洲故於學生不無寬待泰西則中國肄業者較少功課亦極認真臣每接見從前在歐美游學之人其得有卒業文憑者大半學問精深心術純正頗多可用之材現在中國力行新政所求正在此

輩若不廣圖造就勢必習於近便繼往無人臣欽奉

明諭追思前事謹就湖北各學堂學生中選得錦銓楊祖謙李人鐸吳連慶善明賓步程陳錄馬德潤等八人派往德國游學其陳錄一名並擬令順道至法國考求學問又選得劉慶雲姚臣懋程毓璘陶德琨朱啟烈徐家琛張繼業楊恩湛雷以綸盧靜恆等十人派往美國游學蕭煥烈夏維松嚴式超劉文彬等四人派往俄國游學該學生等志趣遠大於各國語言文字及各種西學門徑已有基緒使其盡心講求不難儲為大用臣於臨行接見時勗以淬勵忠愛之忱深究精微之要並於其出洋入塾時派令曾在美國肄業學成而歸之候

選同知施肇基偕往經理其英法兩國游學學生俟派定後再行

奏明辦理至學費一層泰西各國本較為浩大近年鎊價奇貴受虧尤多統計此次出洋學生每年約需銀六七萬兩再三樽節無可裁減明知鄂省用款支絀萬狀此項費用甚屬不貲然為大局起見不敢惜此鉅款惟有飭司局竭力籌畫以備應付其餘一切事宜悉遵照外務部議覆出使各國大臣籌議出洋學生章程辦理除咨外務部並咨行出使美國德國俄國大臣隨時照料考察約束外所有選派學生出洋游學緣由謹會同南洋大臣署兩江總督臣張之洞恭摺具

奏伏乞

皇太后

皇上聖鑒謹

奏

湘撫俞奏設師範館並續派學生留學日本摺

光緒二十九年

奏為湖南遵設師範館並續派出洋留學各情形恭摺仰祈

聖鑒事竊臣於上年欽遵迭次

諭旨開設學堂節將辦理情形奏明在案伏查興學以開拓民智為指歸立教以培植本根為要義學堂等級雖繁必先從事小蒙各學而後教育可期普及為學乃有階梯湖南府廳州

縣通計八十有七處開辦以來經臣督同學務處司道認真稽核除應設之中學十數處以程度稍高正在經營外其各廳州縣小學堂大率已具基礎蒙學分族學鄉學兩項辦法已報開設者亦均有成數可稽惟以教習乏人紛紛稟請選派驟無以應恭查

欽定章程於學科階級指示至為詳悉而各處從前教法往往偏記誦而畧講解專考古而薄知今重文藝而輕實驗積習相沿若非教習得人雖授以規制其歸宿將仍與書院無異而蒙小學同時併舉需材尤衆亦安得無數完備之教員廣為分布臣深維其難於開辦之始奏遣速成師範生十一人前

赴日本游學數月考求學校制度俾卒業歸國以備參酌嗣於上年鄉試後搜取年三十以內落卷之文理較優者覆加考驗取錄正備生七十餘名適東游各生畢業旋省雖迫於時日所得未深而於教授管理方法類能言其大畧乃於省垣先行賃屋開設師範館一所分派各生為監督齊長調正取生四十名相與講習每名月給膏火銀四兩復派各府廳州縣各選送高材生入館一同肄業每名膏火為數甚微其備取各生及各屬之已充教習者亦准其自備火食來館講習館中聘經史教習各一人圖算理化各科教習擬派員前赴日本招致專門卒業生充當以臻完備而延請在籍前國

子監祭酒王先謙為館長主持全學定於二月初三日開學
一切學科課程規則悉遵

欽定章程辦理惟卒業年限定章以四年咨送考驗優與出身現
以需才孔亟不得不從權辦理擬開館一年後考驗學業及
格者即給予文憑准充各屬教習二年三年後亦如之如年
資尚淺願留堂卒業者聽或既當教習仍願回堂卒業或派
充教習時逾三年教有成效亦准其一律考驗咨送以示鼓
勵至養成師範必附屬蒙學以為實驗之地普設學堂必編
譯書籍以備教科之用擬於開館後添設編譯局一所蒙學
堂一所由館長分督齊長等妥慎經理此 臣開辦師範館之

情形也惟備用貴應急需而儲才宜圖久大上年臣派遣速成師範生出洋時曾陳明續選才俊端方之士送赴各專門學校茲於各道遴選拔貢生吳友炎等二十四人臣親加考驗皆品行端正中學具有根柢去秋日本高等師範學校校長嘉納治五郎來湘臣面與訂明咨送該生等先入該國宏文學院習豫習料一年半然後分派入師範學校及理法農工各專門學校三年歸備中小學堂及實業各學教習之用派學務委紳揀選知縣梁煥奎於本月督同東渡各生均已出具卒業歸國願充教習三年切結屆時適與師範館卒業期限正相接續而教習人才自無缺乏矣留學前後四年半

除川資外擬每人每年給日鈔三百六十元匯費在外由善後局按年如數匯寄遵

旨作正開銷綜計師範館常年經費及出洋各生留學各費每歲共需銀約一萬七八千兩內外雖一時財力支絀而培養教員於全省興學實有重要關係自不得不勉以圖經布政使張紹華按察使黃建筦暨各局司道詳請具

奏前來臣維今日不振興實學無自強之基不加意教員無興學之理湖南風氣樸厚自奉

明詔興學鄉僻士民已多感發興起學堂命脈全在教習開設師範館以應目前之求派出洋游學以資廣續之用實皆當務

所急臣謹當率同司道嚴加考核一切恪遵定章辦理期收實效以仰副

朝廷造育人才之至意所有遵設師範館及續派出洋留學緣由謹會同署湖廣督臣端方恭摺具陳伏乞

皇太后

皇上聖鑒謹

奏

政務處奏議覆湖北請獎派赴日本游學畢業學生摺

光緒

三十年

奏為遵

旨議覆恭摺仰祈

聖鑒事本年三月十二日准軍機處鈔交前署湖廣總督端方奏
派日本游學畢業回國學生照章請獎一摺奉

硃批政務處議奏欽此據原奏內稱湖北各學堂學生自光緒二
十四年選赴日本游學歷年續派已逾百人比年陸續回國
領有卒業文憑再三察覈與新章應給獎勵之案相符謹繕
單請獎等語臣等伏查光緒二十七年八月初四日欽奉

諭旨選派學生出洋游學學成領有憑照回華即由該督撫學政
考驗如實相符出具切實考語咨送外務部復加考驗擇尤奏
請獎勵自備資斧游學者得有優等憑照回華准一體考驗獎

勵均候旨分別賞給進士舉人各項出身等因欽此又二十九年八月十六日湖廣總督張之洞奏鼓勵游學章程內開在日本各學堂畢業學生由出使大臣出具切實考語咨送回國

欽派大臣照所學科目詳細考驗果於所得文憑相符再行奏獎分別予以進士舉人各項出身學問全備者從優給以翰林出身原有出身者給以相當官職並聲稱定章以前畢業學生由該督撫考驗即照新章給獎等因今據該署督單開學生劉邦驥等二十一人所請官階出身覈與定章尚屬相符惟查前奉

諭旨出洋畢業學生須由該督撫等出考送部覆加考驗上年張之洞所奏章程亦請由

欽派大臣考驗再行奏獎該學生等畢業雖在定章以前辦理完未便兩歧此項畢業學生自應遵

旨覆加考驗以昭慎重擬請嗣後各省出洋學生畢業回國該督撫學政考驗相符均令出具切實考語咨送來京各項專門之學由學務大臣考驗其武備一門由練兵處王大臣考驗如果確有心得再行擬定等第交部帶領引

見請

旨錄用此次該署督請獎之劉邦驥等據稱均在日本士官學校

卒業間有入聯隊學習者應令出具切實考語備文咨送學務大臣練兵處王大臣查明畢業年限是否與定章相符分別考驗遵照此次奏案辦理如蒙

俞允即由臣等咨行湖北並通咨各省一體遵行所有遵旨議覆緣由是否有當伏乞

皇太后

皇上聖鑒訓示謹

奏 光緒三十年三月二十八日具奏奉

旨依議欽此

出使日本大臣楊奏陳兼管學務情形摺 光緒三十年

奏為具陳兼管學務情形恭摺仰祈

聖鑒事竊奴才欽奉

恩命兼管游學生總監督受任以來兢兢業業既不敢務為刻覈阻學生進步之機又不敢過事優容長學生器凌之習因擬經權并用以期調劑得宜茲謹將辦理情形為我

皇太后

皇上陳之近數年間各省官費自費生到東游學者日增月盛其中循規蹈矩專務學業者固多而縱性任情好為橫議者亦在所不免此等學生均應善為開導使之改良勢不能遽繩以法蓋出洋學生與在內地者不同遇有事故其法權須操

之外人也然監督平時接待學生亦不可過於謙抑輕於然諾誠恐過於謙抑則學生有藐視之意輕於然諾則學生有非分之求求之不得則以小事衍作大題多方挾制名為勸公憤其實洩私嫌慙慙多人聚而生事迨至事體難以轉圜不得不告之外人乞為捕治夫以己之學生竟至乞捕治於外人未免貽學生之口實致外人之譏評甚非計也奴才之意以為學生不憚勞苦遠別家室負笈東游無非欲學就通才歸而致用為監督者正宜自處若父兄視之如子弟時時愛護事事體恤其有銳志向學者則獎勸誘掖之隨行磨學者則警覺提撕之務必動以真誠自知感愧既知感愧則知

敬畏雖有桀驁不馴之氣亦漸潛消奴才有見於此故於學生之到署請謁必隨到隨見無所阻拒並親詣游學生會館傳集大衆演說正宗大意是勸勉各學生共抱忠愛之忱勿蹈詖邪之行其湖廣督臣張之洞

奏定約束游學生章程亦經僱匠刊刷多張分給各省游學生遵守奴才間日仍親率參隨各員輪流到各學校考察各學生課程各學生如有切己之事應為料理者亦准其隨時面稟總期上下情誼息息相通不致分疏勢隔互啟猜疑至各學生遇有受人欺侮者查得實據必為之申理以故各學生多心悅誠服邇來甚屬安靜並無譁張為幻之事第念各學

生品行之優劣學業之勤惰非詢之校長教習不能得其底
蘊因與各校長教習時相接洽而各學生見此情形倍加勤
慎奴才現查得各學校共有中國學生一千三百餘人其中
學文科者一千一百餘人學武科者二百餘人其數不為不
多然奴才構昧之見以為日本陸軍經營數十年成效最著
中國似宜添派學生來東專送入陸軍各學校以期成就遠
大用濟時艱曩者日本陸軍諸將佐曾與前總監督汪大燮
言及中國學生在陸軍各學校肄業者係有陸軍大臣奏明
日君撥發庫款添建屋宇加派委員教習別給薪俸使專理
其事第中國於此等學生時派時止或多或少頗難辦理嗣

後宜定額數每歲或派二百人或百餘人或兩次或一次分
班來東入校肄業則屋宇俸薪不為虛設等語近日諸將佐
又以前言向奴才面述具見彼國實有期望中國振興陸軍
之意考日本陸軍教育係以忠君愛國順服長官為宗旨并
無侈言自由與政府反對之弊惟是學陸軍者每歲所費較
多於學文科者數倍非自費生所能備辦似宜以官費培植
之俾資造就即如日本現在尚不惜鉅費歲派成材數十人
游學歐美其用心深遠可為借鑑查管學大臣張百熙等近
已奏派學生三十餘人來東送入文科各學校肄業惟當此
列強環伺我國孔棘武科較文科更重未可緩圖雖各省督

撫近亦有選派武學生來東肄業者然為數有限恐不敷干城之選應否

飭下各省將軍督撫於世家宦族內遴選文武兼資之少年學生添派來東分定班數人數送入陸軍各學校肄業以廣將才而資錄用之處出自

聖裁再查各省游學生近日均知

朝廷興學育才之意至為急切多有爭自濯磨以期學成見用者奴才仍當隨時認真約束考察并將來盡事宜咨商管學大臣暨各省督撫妥為辦理所有奴才兼管學務情形理合恭摺具陳伏乞

皇太后

皇上聖鑒訓示謹

奏奉

硃批練兵處知道欽此

直督袁奏游學日本畢業回國供差北洋各學生照章咨送

考驗摺

光緒三十年

奏為遵

旨請將游學日本畢業回國供差北洋各學生照章咨送考驗繕

單恭摺仰祈

聖鑒事竊照光緒二十七年八月初四日欽奉

上諭選派學生出洋游學學成領有憑照回華即由該督撫學政
考驗如實相符出具切實考語咨送外務部復加考驗擇尤奏
請獎勵自備資斧游學者有優等憑照回華准一體考驗獎勵
均候旨分別賞給進士舉人各項出身等因欽此嗣於二十九
年八月十六日湖廣總督張之洞奏鼓勵游學章程內開在
文部省直轄高等各學堂暨程度相等之各項實業學堂三
年畢業得有優等文憑者在學前後八年給以舉人出身在
大學堂專學集一科或數科畢業後得有文憑者在學前後
十年給以進士出身並聲稱此次定章以前畢業學生均照
此次章程由各省督撫考查其品行心術所學程度照新章

給以出身其學速成科畢業減短年限者查明所短年限令以回國後當差勞績之年資補之扣足年限一體給以出身又本年三月二十八日政務處議覆前署湖廣總督端方奏請照獎日本畢業回國學生一摺內稱嗣後各省出洋學生畢業回國該督撫學政考驗相符均令出具切實考語咨送來京由學務大臣考驗如果確有心得再行擬定等第交部帶領引

見請

旨錄用先後均奉

旨允准各在案仰見

朝廷勸學培才之盛意欽感莫名臣查定章以前畢業學生通計前後在學年限自係將本國官私學堂併計至速成科畢業減短年限者尚可補以回國後當差勞績之年資則其畢業於完全科者亦當以勞績年資併計更不待言北洋庶政殷繁百廢待舉凡游學日本畢業回國之學生其心術純正學問優長者經臣陸續派辦洋務及師範實業各學堂局廠該生等出其所學措置裕如臣隨時考驗類皆敦品勵學不染囂張習氣洵為有用之材與應給獎勵新章實相符合值此時事多艱需才孔亟該生等年力正富必予以進身之路方能感激馳驅日本明治初年重用出洋回國學生遂有今

日富強之效

臣謹遵

明諭出具考語繕單恭呈

御覽合無仰懇

天恩俯准將游學日本畢業回國供差北洋各學生援照新章
飭下學務大臣分別考驗給予獎勵出自

鴻慈逾格所有遵

旨請將畢業各學生咨送考驗緣由除出具切實考語備文分咨
外務部學務大臣查照辦理外謹繕摺具陳伏乞

皇太后

皇上聖鑒訓示謹

奏

川督錫奏選派監督率領諸生前赴日本學習師範速成科

片 光緒三十年

再查學務大臣奏定學務綱要內開各省應即按照現定師範學堂辦法舉行若無師範教員即速派人到外國學習師範教授管理各法速成科師範生回國即依仿開辦等語良以教育人才首在造成師範而師範之業非經實力肄習與窳無由明程度不能合也川省上年曾籌官費派學生二十名前往東洋游學現在普通兩經卒業尚待升入專門計其回川効用尚需年歲現籌辦理學堂微特教習難得其人即管

理亦罕知其法一切教育規則深恐名是實非爰飭各屬集
資選士前赴日本師範速成科練習以期學成回省轉相講
授用收速效奴才前已附片陳明茲據陸續選齊稟報聽候
派令出洋惟人數至一百有奇若非派員監督隨時束其身
心示以宗旨則氣質不齊或慮誤涉奇異之趨染成弛張之
習殊非所以仰副

朝廷興學育才至意查有在籍刑部候補主事周鳳翔操履端
純志存忠愛曾赴東瀛考察學校回川後留省辦理東文學
堂事務堪以派充監督率領諸生前赴日本學習師範速成
科畢業同返經理學堂庶收效較速達基有資實於學務不

無裨益除分咨外是否有當理合附片具陳伏乞

聖鑒訓示謹

奏奉

硃批學務大臣知道欽此

川督錫奏選募官員士子分赴歐美各國學習路礦製造專

門實業片

光緒三十年

再川漢鐵路已設公司軌政將興凡車道之工程法制器用
應剖析其理研求其學且川省礦產饒而罕能辨識槍械成
而未底精純良由泰西各有專門蜀徼僻遠無人曾往習其
實業也雇洋匠購洋械終類隨人作計以視自辦者不可同

年而語在前猶有可諉今則迫之以不待遲徊查比國路礦之學五洲推美而學費亦較省歐美等廠於製造槍砲尤屬擅長奴才選募官員士子十三名查有江西議敘知縣劉鍾琳明通精實夙具血誠咨商江省調令赴鄂接帶各員生前赴比國分習路礦即以劉鍾琳為監督並揀繙譯等員隨其同行又前經

奏派道員章世恩攜帶官員等二十名前赴歐美專習機器製造續委直隸州知州楊兆龍充當監督先後渡洋該學生等畢業回華總在三五年以後遠適異域又必盡心研究深造有得而歸倘非拔擢有加何以生其感奮伏查游學成案畢

業回國派員考驗奏請獎敘六年畢業得有優等文憑者續
行奏獎一次川省前兩項出洋肄業之官員等擬俟卒業後
回川考驗優者請照異常勞績保獎次者請照尋常勞績保
獎監督等亦應一併獎敘較之外務部出洋獎案雖為不逮
猶不失鼓舞之資重名器而勵人才二者庶乎有合應懇

天恩俯准飭部立案除遵照外務部新章分咨照辦外謹附片具

陳伏乞

聖鑒訓示謹

奏奉

硃批外務部知道欽此

湘撫趙奏遣派學生往美比兩國學習礦業片

光緒三十年

再查湘省礦產富饒業經設立總公司並由前撫臣俞廉三

暨奴才

先後定立章程自行開採近來該公司於中南北西三

路購地勘苗集賢籌辦雖未大著成效而所開之礦為數頗

多自應在於此時講求礦學以保權利而儲才能前已由俞

廉三

奏明派有學生三名前赴日本預備普通學再行派往美國學

習礦業仰蒙

俞允在案茲查該學生梁煥彝許崇周陳洪鑄三名在日本留學

頗有成效自應遣赴美國以符成案又查西洋礦學以比利

時國為精而比國素用法文當經奴才逐細考選得法文學生李定煌莊啟張定祥三名均於普通學尚能明晰法文算學尤工堪以派往比國留學礦業所需學費由湘籌給作正開銷據礦務局司道會詳請

奏前來除分咨查照外謹附片具陳伏乞

聖鑒謹

奏奉

硃批該部知道欽此

出使美國大臣伍咨請另換游學合格護照文

光緒二十七年

為咨呈事光緒二十七年八月十三日承准

貴爵閣督部大臣咨開據美國教士麥美德代華學生孔祥熙山西太谷縣人費起鶴直隸通州人赴美國學堂肄業請給護照前來當查光緒六年中國與美國續修條約任便往來照式填註飭令至美呈關驗放除分繕護照轉發該學生孔祥熙等收執俾利通行外相應咨會請煩查照等因承准此查學生孔祥熙費起鶴業經來美金山稅關以該學生呈驗護照與前大臣楊光緒二十年中美續約後所訂華人來美執照未能符合阻其登岸據駐金山總領事電稟當經再三與美戶部駁論現准該學生先行登岸在金山總領事署暫住再將原領護照寄回補領如式執照茲將光緒二十年續

約後所定執照程式另紙照錄以便該學生等換領執照時
照式填註飭寄來美以符成案理合備文咨呈謹請察核施
行須至咨呈者

右咨北洋

附錄函稿

謹按伍大臣咨文外復有
函稿一件茲並節錄於後

昨奉

大咨學生孔祥熙費起鶴舟抵金山稅關以護照洋文不合
體式駁阻登岸廷芳當即詣戶部請其轉飭稅關照約放行
戶部謂中美之約當以光緒二十年楊大臣商訂之續約為
准約內聲明官商游歷教習學生不在禁工之列如來游美

須持有中國政府授權發照之關隘官所給執照填明籍貫
年貌行業經美領事簽字呈驗相符始准登岸今該學生所
領護照填註各項並不如式該學生等礙難放行等語廷芳
再三駁詰謂此照經美領事蓋印如不合體式美領事何不
立時更正既由美官核定則誤在美官不在學生現奉到
中堂公牘該學生遠涉重洋數萬里來美豈能阻留彼謂有
方

中堂台命負歉良深但此事經中國定約美國立例戶部稅
關是行例之官不能稍為任意務望曲原辨論數四仍持前
說詢之本署律師科士達亦謂無權改例難與力爭後再與

副戶部曲商設法令學生二人先行登岸在金山領事署暫住再將前領之照寄回更正此是通融辦理之法前照如到乞飭知津海關道查照光緒二十年中美續約定後給發華人來美執照之體式詳晰填註發還以符成案檢查舊牘美國於一千八百八十四年七月五號議院增修限制華工新例第六款內開凡華人非屬傭工必先由中國政府或中國政府所准授權發照之官查明應准來美之人確有証據者給予執照將其姓名年歲身材相貌事業等項逐一填註明晰本官親簽漢文名字並交駐該處之美領事簽押作為來美確據等語經楊通使繕就華洋文程式咨呈

總理衙門通行沿海各省各關道在案再查向章護照是行
之內地執照則通行境外從前華人領照赴別國者皆是執
照有光緒六年上海道給華人往暉春等處照式可查且護
照二字英文曰巴士撥特執照二字英文曰嗇的非隔特音
義迥然不同舊卷洋文原是執照華文譯作護照是屬筆誤
此次繕呈照式特將華文照洋文更正合併聲明又查楊任
照會外部中國發照之權專歸海關道海關監督其餘大臣
督撫並未聲明揆其本意原欲事例劃一但外人交涉之案
一經限定便成鐵板註腳不能遷就美官以為中國祇有關
隘官有權發照其餘各官並無發照之權以致疆吏使臣欲

令一人入境亦多阻礙此約將屆滿期計至光緒二十九年即須修改似應援照西例將舊約有不便之處於續立新約之時酌加修改將華人入美境之條量為更正聲明中國商民人等凡領有督撫大吏及中國派駐各國公使所發之執照均可准其入境庶使官商往來暢行無阻云

外務部劄自備資各學生不准入士官學校文

光緒二十九年

為劄行事查各省前赴日本游學生應由總監督分送各學校肄業士官學校係講求武備之所必須人品端正根柢清白方可送入嗣後凡自備資各學生未經各督撫學政咨送者概不准入士官學校相應劄行該總監督查照即與日本

參謀部訂明辦理為要須至劄者

右劄日本游學生總監督

外務部咨送出洋學生漢洋文護照文

光緒三十年

為咨覆事迭准咨稱茲有奏明選派學生何育杰等十五名

分赴

法英法美

等國學堂肄業照案咨請照會

法英法美

各國公使電達外

部俟該學生等到洋時優加照料並由貴部繕給漢文護照

配帶洋文請

法英法美

各使簽字再該學生等係同時由華起程至

法境馬賽分途請另繕總照一紙由法使簽字一併咨送本

大學堂以便發給該學生等擇日登程等因本部現已繕就

漢文護照各一紙配帶洋文蓋用本部印信函請各國公使

二ノ
簽字並電達該外部轉飭優加照料另繕法文總照一紙專
請法使簽字去後旋准各使將各護照簽字訖先後送還又
准法國呂使另送法文度關照二張並請將該生等啟行日
期迅即佈知以便電達該外部轉飭優加照料等因函復前
來相應將漢洋文合璧護照十五張法文總照一張法文度
關照二張咨送

貴大學堂分別發交該學生等收執至該學生等擇定何日
啟程並希見復以便轉復各該使可也須至咨者

右咨京師大學堂

出使日本大臣楊咨各省咨送學生務取保狀以免流韓文

光緒三十年

為咨呈事竊照游學日本諸生欲入武科各學校者本大臣
必詳加查察若非領有大吏咨文則不准保送以示限制而
符定章乃近聞有等學生領咨到東後另覓保人送入文科
私將所領咨文贈與同學冒遞請送入武科雖查無實據
然既有所聞不得不防微杜漸擬請各省嗣後咨送學生來
東如係習文科者則將該生年貌籍貫並欲入某學校肄業
於咨文內切實聲明如係習武科者則仿照各省考取武備
學生章程飭該生於領咨之先自呈影相片二張以一張存
案以一張粘貼咨文尾加蓋騎縫印然後封給該生實報以

為查驗真偽之據其咨文內所開該生姓名務飭房書繕寫清楚切勿挖補填改致滋疑竇再查日本現行規則武備各學校統歸參謀本部經管中國學生欲入校肄業者無論官費自費均須由本大臣咨送方許照收如有虧欠學費者必照會本大臣代為追繳現在各省自費生到東游學者日增月盛虧欠學費時有所聞若一一代為追繳既嫌紛擾且有避匿不見無從查問者辦理每形棘手嗣後咨送此等學生並望取具殷實紳商保狀聲明並無虧欠學費隨文附送使署存案遇有虧欠學費者即可咨會本省惟保人是問庶不致學費無著有礙學生聲名至於學生請咨游學各衙門書

役人等難保無需索規費等弊亦請通飭嚴禁以免阻學生
進步之機除通咨各省督撫查照辦理外相應咨呈

貴部謹請察照須至咨呈者

右咨外務部